

Aen Siujyoz Roxndeq Youh Guh Daengz Cuengh Gun Song Saw Vah Sonhag

知行并重的壮汉双语小学

——Geiq Hongsaeh Ak Lozyez Yen Dungzloz Cin Bingzcai Siujyoz

□bonjbauq gicej Dangz Lungz

Aen douhung hagdangz daengjdwt ndeiyawj.

Lozyez Yen Dungzloz Cin Bingzcai Siujyoz youq Mbanjbingzcai, liz yienhsingz 2 goengleix gya; laeb youq 1942 nienz. Aen hagdangz neix ciusou lwnyeiz 15 aen mbanj, baugvat 584 ranz 2180 vunz. Hagdangz dieg gvangq 2800 bingzfanghmij, gencuz menciz 2123 bingzfanghmij, miz song doengh laeuzsonhag nem doengh ranz-gwnngaiz hagseng ndeu, doengh-yiengh sonhag boiq miz haemq caez. Ndaw hagdangz seizneix miz 20 boux lauxsae, 11 boux miz daconh yozliz, 5 boux miz bwnjgoh yozliz, lauxsae hab iugouz caez. Seizneix miz 7 aen ban, gungh 246 boux hagseng, ndawde Bouxcuengh 109 vunz, ciemq cungjsoq 44.3%; lwnyeiz hab haeuj-hag cungj haeuj caez lo.

Lai bi daeuj, aen hagdangz neix itsim hopheux “aeu Cuengh guhcawj, Cuengh Gun giethab, aeu Cuengh coi Gun, Cuengh Gun caez rox” “cibroek cih” fuengcim neix guh hong song saw vah sonhag, cingzcik yienhda.

Ranghdieg gvi Bingzcai Siujyoz ciusou hagseng de, dingzlai vunz dwg Bouxcuengh, ndawde dingzlai lwnyeiz daj iq couh gangj Vahcuengh. Dangqna, Bouxcuengh dangdieg gangj Vahcuengh nem Vahgun. Aen sigij gonq 80 nienzda, Bingzcai Siujyoz ndaej dingh guh Sawcuengh haeuj hagdangz saedniemh hagdangz. Ndaw hagdangz miz song boux lauxsae dwg hag Sawcuengh conhyez, songde rapdawz hong sonhag Sawcuengh; moix singhgiz moix aen ban hwnj song dangz Sawcuengh; moix singhgiz sam nem singhgiz haj cungj hwnj dangz vwnzva minzcz. Youq sonhag diyyuz seizde, cab haeuj mbanj minzcz diyyuz, lumj fouxfaexsoux, cai-maxgyaek daengj; hwnjdangz meijsuz doenghfwngz, lauxsae son hagseng dinfwngz ngaihrox gvendaengz raed ceij ndawbiengz, hawj hagseng ndaej guh' angq, youh ndaej swncienz vwnzva minzcz, lai rox cihsiz lai miz dinfwngz.

Dangguh ndaw yienh aen hag-

dangz lajmbanj ceiq hung, “denswja sonhag” cungj dwg yiengh daegsaek hung ndeu, aen hagdangz neix ciepvangjloz, moix aen ban cungj miz dennauj ciepdoeng vangjloz. Baengh dohmeizdij guh sonhag, hawj hagseng sim' angq dwk hag ndaej cihsiz.

Doengzseiz, aen hagdangz neix yawjnaek hong beizyangj lauxsae. Moix haggeiz cungj senj nem soengq lauxsae bae baihrog hagsib, dingq vunz hwnjdangz, hawj lauxsae ndaej daezsang suijbingz. Gaenh 5 bi neix daeuj, gungh miz 8 boux lauxsae fatbiuj lunvwnz roxnaeuz ndaej ciengj. Youz lauxsae sonhag Cuengh Gun song saw vah daiqlingx hagseng, camgya Gvangjsih siuj-hagseng doxdax yienj cezmuz

Vahcuengh nem Gvangjsih siujhagseng doxdax aeu Vahcuengh biucinj gangj gojgaeq daengj, cungj aeundaej baizmingz ndei.

Lai bi daeuj, hagdangz ciuq cingzgvang guh sonhag, daengxcungq lauxsae doengzcae haenqguh, sonhag cingzcik ndaej onjdwat daezsang. Moix haggeiz doeksat gaujsi, caeuq doengzloih hagdangz doxbeij, cing-cik baiz youq baihnaj, ndaej vunzlai nem lingjdauj ndaw yienh gyauyuzgiz haenhndei.

Seizneix, baengh gyoengq lauxsae maenhndei akgiengz, mozi sonhag miz yungh, goq dangz anbaiz hablaix, vwnzva hagdangz noengzna, aen hagdangz neix guh hongsaeh sonhag Cuengh Gun song saw vah, haengjdingh bi beij bi lai ndei dem.



▲ Yienh gyauyuzgiz lingj-dauj bae gwnzdangz dingq lauxsae hwnjdangz.



▲ Lauxsae haeujsim sonyinx hagseng.



▲ Son' gyauq hagseng lai rox boizbauq aencingz.



▲ Gyoengq lauxsae ndaw hagdangz camgya ndaw cin doxdax dwk gibaizgiuz cingzcik gig ndei.



▲ Hagseng camgya hozdung doxdax aeu Vahcuengh biucinj yienj cezmuz le angq hab' ingj.



▲ Lauxsae son hagseng eu fwen swncienz vwnzva minzcz.



▲ Youq duenh guh beizyin, lauxsae hwnjdangz daiq yiengh ndei.



▲ Guhcaemz sim' angq youh ndaej ciengj.